

BOSNA I HERCEGOVINA
FEDERACIJA BOSNE I HERCEGOVINE
ZENIČKO-DOBOJSKI KANTON
OPĆINSKI SUD U ZENICI
Broj: 43 0 St 236529 23 St
Zenica, 20.12.2024. godine

Općinski sud u Zenici, sutkinja Marina Šapina, u stečajnom postupku nad društvom OMEGA Oil Društvo sa ograničenom odgovornošću Zenica, ul. Goraždanska b.b., Zenica, zastupan po zastupniku po zakonu Rastoder Safetu, direktoru društva, odlučujući o prijedlogu privremenog stečajnog upravitelja Muamera Pašalića iz Zenice, nakon održanog ročišta dana 10.10.2024. godine, kome je prisustvovao privremeni stečajni upravitelj i zastupnika po osnovu zakonu predlagatelja, direktor Rastoder Safet, van ročišta dana 20.12.2024. godine, donio je:

R J E Š E N J E

Otvora se i zaključuje stečajni postupak nad društvom OMEGA Oil Društvo sa ograničenom odgovornošću Zenica, ulica Goraždanska bb, Zenica, MBS: 43-01-0336-09, zbog nepostojanja stečajne mase, te se nalaže brisanje ovog privrednog subjekta iz sudskog registra zavedenog u reg. ul. broj: MBS: 43-01-0336-09, a po pravomoćnosti ovoga rješenja.

O b r a z l o ž e n j e

Predlagatelj OMEGA Oil Društvo sa ograničenom odgovornošću Zenica, ul. Goraždanska b.b., Zenica, zastupan po zastupniku po zakonu Rastoder Safetu, je ovom sudu dana 19.10.2023. godine, podnio prijedlog za otvaranje stečajnog postupka nad ovim privrednim društvom, zbog platežne nesposobnosti stečajnog dužnika.

Rješenjem ovoga suda br. 43 0 St 236529 23 St od 05.07.2024.. godine, pokrenut je prethodni postupak radi utvrđivanja uslova za otvaranje stečajnog postupka nad imovinom stečajnog dužnika OMEGA Oil Društvo sa ograničenom odgovornošću Zenica, ul. Goraždanska b.b., Zenica, MBS: 43-01-0336-09 i za privremenog stečajnog upravitelja imenovan je Muamer Pašalić iz Zenice, Dr. Ćire Truhelke 8c.

Na ročištu za ispitivanje uvjeta za otvaranje stečaja održanom dana 10.10.2024. godine, privremeni stečajni upravitelj je izjavio da ostaje kod svog izvještaja od 22.08.2024.god.. Navodi da na osnovu iskazanih finansijskih vrijednosti u bilansu stanja na dan 30.09.2023. godine, društvo nema evidentirana stalna sredstva, zalihe, novac na blagajni, nenaplaćena potraživanja od trećih lica, niti bilo kakvu drugu imovinu, a što proizilazi iz Obavijesti Općinskog suda u Zenici -ZK ured od 02.08.2024. godine, u kojoj je navedeno da društvo u svom vlasništvu nema nekretnine na području grada Zenica, Uvjerenja MUP ZDK Sektor za administraciju Zenica od 26.07.2024. godine iz kojeg proizilazi da društvo ne posjeduje motorno ili priključno vozilo i Uvjerenja Službe za imovinske pravne poslove i katastar nekretnina Grada Zenica od 22.08.2024. godine, iz kojeg proizilazi da društvo u navedenom katastarskom operatu nije upisano kao nositelj prava.

Nadalje izjavljuje da obaveze iskazane u bilansu stanja na dan 30.09.2023. godine, iznose 443.018,00 KM i imaju tendenciju stalnog rasta. Obaveze iz poslovanja prema dobavljača u zemlji prikazano u iznosu od 362.152,90 KM, obaveze za porez i posebne dažbine na plaću u iznosu od 444,27 KM, obaveze za doprinos za PIO/MIO, zdravstveno i osiguranje u iznosu od 37.000,72 KM, obaveze po

osnovu plaća, naknada i ostalih primanja u iznosu od 22.937,18 KM, obaveze za PDV u iznosu od 4.040,15 KM, ostale obaveze za poreze i doprinose i druge dažbine 1.073,00 KM, te obaveze po osnovu takse na istaknutu firmu 2.200,73 KM. Ističe da društvo ima otvorene račune u Sparkasse i Ziraat banci. Račun u Sparkasse banci je blokiran od 23.01.2024. godine, dakle nakon podnošenja prijedloga za otvaranje stečajna, dok Ziraat banka nije dostavila tražene izvještaje.

Navodi da društvo ne obavlja svoju registrovanu djelatnost duže od 10 godina, niti ima mogućnosti da se poslovanje može nastaviti. Prijedlog za otvaranje stečajnog postupka je, na osnovu dokumentacije iz spisa i naknadno pribavljene dokumentacije, pokrenut u pisanoj formi od strane zakonskog zastupnika Safet Rastoder.

Ističe da je prijedlog za otvaranje stečajnog postupka podnesen u zakonskom roku. Dugovanja su dospjela, a račun u Sparkasse banci je blokiran od 23.01.2024. godine tj. nakon podnošenja prijedloga

Kako iz svega naprijed navedenog proizilazi da nema uvjeta za dalji rad i poslovanje društva, da postoje obaveze društva u iznosu od 443.018,00 KM, dok je stečajni upravnik dalje utvrdio da društvo nema nikakve imovine iz koje bi se mogli namiriti djelimično troškovi stečajnog postupka, predlaže da sud pozove povjerioce i zainteresirana lica da predujme iznos od 5.000,00 KM, na depozitni račun suda, te u koliko u ostavljenom roku ne predlože otvaranje, i ne predujme navedeni iznos, da sud donese rješenje o otvaranju i zaključenju stečajnog postupka i po pravomoćnosti istog da društvo briše iz sudskog registra.

Rješenjem od 10.10.2024. godine, sud je pozvao povjerioce i zainteresirana lica da u roku od 30 dana od dana objavljivanja poziva predlože otvaranje postupka i uplate predujam za obezbjeđenje troškova stečajnog postupka u iznosu od 5.000,00 KM, na depozitni račun ovoga suda.

Rješenje ovog suda od 10.10.2024. godine, objavljeno je na oglasnoj ploči suda 14.10.2024. godine, na web stranici suda i u „Službenim novinama Federacije BiH“ broj: 83/24 od 23.10.2024.godine.

Kako stečajni dužnik ima obaveze, dok nema imovine, pa ni za namirenje troškova stečajnog postupka, a povjerioci i zainteresirana lica po proteku roka ostavljenog u rješenju donesenom od strane ovoga suda nisu predložili otvaranje stečajnog postupka niti predujmili novčani iznos potreban za pokrivanje troškova stečajnog postupka, to je primjenom odredbe člana 102. stav 8. Zakona o stečaju, odlučeno kao u izreci ovog rješenja.

Sukladno odredbi člana 108. i člana 204. stav 5. Zakona o stečaju, ovim rješenjem određen je upis rješenja o otvaranju i zaključenju stečajnog postupka koje usljed nedostatka mase prestaje postojati, te brisanje ovog pravnog lica iz sudskog registra.

POUKA O PRAVNOM LIJEKU

Protiv ovog rješenja može se izjaviti žalba
Kantonalnom sudu u Zenici u roku od 8 dana
od dana prijema, putem ovog suda. Žalba se dostavlja u
dovoljnom broju primjeraka za sud i protivnu stranku.

Sutkinja:

Marina Šapina